

# Vischnaunca politica Andiastr

---

**Radunonza communal dils 23 d'october 2009**

## **1. Beinvegni ed elecziun dil dumbravuschs**

President communal Sievi Sgier fa in cordial beinvegni. Sco dumbravuschs vegnan Priska Capaul e Marcel Sgier proponi ed elegi. Encunter la gliesta da tractandas dat ei neginas objecziuns.

## **2. Prelecziun ed approbaziun dil protocol dils 21 d'uost 2009**

Il protocol dalla davosa radunonza communal dils 21 d'uost 2009 vegn prelegius ed approbaus unanimamein.

## **3. Elecziuns per la perioda d'uffeci 2009/10**

A caschun dallas radunonzas dils 24 d'october 2008 e 28 da november 2008 han buca tut ils uffecis communalis saviu vegnir occupai. Ei resta d'eleger ils sequents ufficials da vischnaunca:

- 2 suprastont(a)s
- 1 suppleant(a)s da suprastonza
- 1 revisur(a)s da quen
- 2 suppleant(a)s dils revisurs

Priska Capaul, presidenta dalla cumissiun da gestiun, ha contactau differentas persunas el vitg per sclarir in eventual interess da suprender in uffeci en vischnaunca. Ella ha denton giu pauc success. Ord miez dils vischins vegn proponiu Tarcisi Dietrich en suprastonza. Tarcisi Dietrich ei presents e declara ch'el stetti buc a disposiziun per quei uffeci.

Pil post vacant da revisur da quen vegn proponiu Imelda Vincenz. Ella ei presenta alla radunonza e declara ch'ella seigi prompta da surprendre quei uffeci. Ord miez dils vischins vegn buc giavischau scrutini, Imelda Vincenz vegn elegida unanimamein tras tscharna.

## **4. Damonda da credit per project da fusiun**

A caschun dalla davosa radunonza communal dils 21 d'uost 2009 ha la suprastonza orientau davart ils projects da fusiun sin ruccha. Ins ha era vuliu udir ils meinis dalla populaziun per aschia saver agir vinavon en caussa. Sin fundament dalla discussiun ha la suprastonza dumandau si las vischnauncas romontschas dil cumin Rueun schebein igl interess davart ina discussiun ed in eventual project da fusiun fuss avon maun. Deplorablamein ein las rispostas sin la damonda stadas negativas, demai che projects da fusiun (Glion+, BVA) ein gia avanzai. Tenor la suprastonza ei quei fatg deplorabels arisguard las collaboraziuns existentas sco era arisguard il fatg dad aschia piarder la caschun da saver formar ina ferma vischnaunca romontscha.

Sco gia orientau dalla davosa radunonza ein las discussiuns per in project da fusiun (BVA) gia lantschadas. En quei project duei vegnir examinau sco ina tala vischnaunca savess vegnir organisada e tgei consequenzas (finanzas, politica, eav) ch'ei da spitgar. Duront quei project vegnan ins medemamein a perseguir autras variantas, aschia ch'ina persuna vegn denter auter a prender part al project Glion+ per aschia haver las informaziuns necessarias.

Tenor indicaziuns digl uffeci da vischnauncas sto vegnir quintau cun cuosts ell'altezia da frs. 15'000.00 per in tal project da fusiun. Plinavon ha igl uffeci da vischnauncas saviu orientar ch'ei vegness installau in gruppa da lavur da nov personas, treis da mintga vischnaunca. En quella gruppa da lavur vegness aunc tratg neutier ina persuna neutrala (coach), che meina las sesidas.

La suprastonza communal fa la proposta dad entrar en in project da fusiun cun las vischnauncas da Breil e Vuorz e da concender il credit necessari ell'altezia da frs. 15'000.00.

Ei vegn menau viva discussiun. Ord miez dils vischins vegn fatg attents che la vischnaunca seigi stada ditg independenta. Ins duei studegiar da rudien cun tgi seligiar en futur. Ina part dalla radunonza giavischa ch'ei vegni examinau omisduas variantas sil medem scalem. Davart dalla suprastonza communal vegn fatg attents ch'ei setracti mo d'in project da fusiun per evaluar las variantas, e buc ina fusiun.

**Il credit ell'altezia da frs. 15'000.00 per entrar en in project da fusiun cun las vischnauncas da Breil e Vuorz vegn concedius cun 18 vuschs encunter 13 vuschs.**

## **5. Damonda da credit per la sanaziun dil tuchiez baselgia**

El clutger da nossa baseglia parochiala sesanflan 3 zenns. Las sutgas dils zenns (Glockenstühle) ein ord ina construcziun da lenn, ils zenns gronds sesanflan ell'alzada sissum. La regulaziun dils zenns ei vegnida installada igl onn 1981 entras la fa. Jakob Muri da Sursee. Dapi lu ei mai vegniu fatg pli grondas investiziuns.

Tuts cundrezs en moviment ein suttamess al sintom d'isada. Aschia ei era vid nies clutger vegniu constatau donns vid il tuchiez. Leu nua ch'ils zenns ein pendi si ein las armaturas da ruina. Medemamein ston ils motors vegnir revedi, las cadeinas da tracziun ed ils battagls ston vegnir remplazzai.

In ulteriur problem ei la fixaziun dils zenns. Cu ei tucca caschunan ils zenns en moviment forzas verticalas ed horizontalas, aschia che la tuor baselgia semova. Ord quei motiv propona la fa. Jakob Muri da fixar ils zenns en in'otra moda.

Ils cuosts totals per la sanaziun san vegnir calculai cun frs. 20'000.00. La vischnaunca d'Andiast, ch'ei possessura dil clutger, separticipescha vid la sanaziun cun las mesadad dils cuosts.

La suprastonza communal fa consequentamein la damonda alla radunonza communal da conceder in credit da frs. 10'000.00 per la sanaziun dil tuchiez baselgia.

**Il credit ell'altezia da frs. 10'000.00 per la sanaziun dil tuchiez baselgia vegn concedius unanimamein.**

## **6. Presentaziun ed approvaziun digl uorden forestal dalla vischnaunca d'Andiast**

Igl urden forestal actual dalla vischnaunca d'Andiast datescha digl onn 1998 e regla il vegl revier forestal da Vuorz/Andiast. Denter auter regla igl uorden d'uaul l'organisaziun, las incumbensas e las obligaziuns dil survetsch forestal dalla vischnaunca. Ils uauls da vischnaunca duein saver ademplier lur prestaziuns da protecziun, d'utilisaziun e dil beinstar public a moda durabla.

Entras la collaboraziun cun il revier forestal Rueun eis ei necessari da reveder il vegl uorden forestal ed adattar tal al temps dad oz. Igl uorden forestal sebasa sin in sboz daus ora digl uffeci forestal cantunal.

La suprastanza communal fa la proposta dad approbar igl uorden forestal.

**Igl uorden forestal dalla vischnaunca d'Andiast vegn approbaus unanimamein.**

## **7. Damonda da vender terren da vischnaunca ad Ignaz Tuor per l'erecziun da dus parcadis**

Cun scriver dils 30 da settember 2009 fa Ignaz Tuor, Cuera, possessur dalla parcella nr. 515 a Sur Begls, la damonda alla suprastanza communal da saver cumprar terren da vischnaunca. Ei setracta da 6 - 8 m<sup>2</sup> dalla parcella nr. 478 (via Camenisch - Fraissen), cunfinonta cun sia parcella. Il motiv ei l'erecziun da dus parcadis.

La suprastanza communal ha en sia sesida dils 14 d'october 2009 priu enconuschientscha dalla damonda e concludiu da presentar tala alla radunonza communal. Ord miez dils vischins vegn menau vivamein discussiun en caussa. Da principi vegn s'exprimiu encunter ina vendita dil terren. Ei vegn fatg valer che la via seigi fetg stretga ed il prighel d'accident seigi avon maun, principalmein igl unviern. Ina sligiaziun pusseviva fuss denton conceder in dretg da baghegiar, il qual vegness purtaus el cudisch funsil. Cun tala proposta sa la radunonza s'accordar.

La radunonza communal concluda cun 25 vuschs encunter 0 vuschs da midar la tractanda, la quala senumna daniev: Conceder in dretg da baghegiar ad Ignaz Tuor per l'erecziun da parcadis sin parcella nr. 478.

**Unanimamein vegn concediu ad Ignaz Tuor il dretg da baghegiar sin parcella nr. 478.**

## **8. Presentaziun ed approvaziun dil preventiv 2009/10 dil consorzi da scola Vuorz/Andiast**

Il preventiv dil consorzi da scola e scoletta Vuorz/Andiast per igl onn da scola 2009/10 siara suenter expensas da frs. 573'900.00 ed entradas ell'altezia da frs. 161'040.00 cun in surpli da cuosts da frs. 412'860.00. La repartiziun succeda tenor il diember da scolars dallas vischnauncas da Vuorz ed Andiast, cun risguardar ils cuosts che seresultan ord la cunvegna cul consorzi da scola Pigniu/Rueun/Siat.

- *Vischnaunca d'Andiast* frs. 174'283.25
- *Vischnaunca da Vuorz* frs. 238'576.75

**Il preventiv 2009/10 dil consorzi da scola e scoletta Vuorz/Andiast vegn approbaus cun 22 vuschs encunter 0 vuschs.**

## **9. Orientaziuns**

President Sievi Sgier informescha davart ils projects sin rucca. Numnadamein sa el informar davart il project dil GEP, nua che las lingias da deflussiun vegnan pridas si cun camera el decuors dil meins november. Era informescha el davart la sanaziun dil providiment d'aua, nua ch'ins seigi vidlunder d'elaborar in project en detagl. Plinavon informescha el ch'ina stanza en casa da scola seigi vegnida affitada sco localitads da menaschi. En quella stanza vegn il biro "Prof. Schuh Real Estate AG" a secasar.

Ultra da quei orientescha il president davart las donazius dil padrinadi svizzer per vischnauncas muntagnardas che la vischnaunca ha retschiert per la sanaziun dalla casa da scola e per la sanaziun dallas vias da funs. Igl importo total munta a frs. 205'000.00.

## **10. Varia**

*Uals:* Ord miez dils vischins vegn fatg attents davart la lenna e las caglias che dattan els uals. El mument mondi pauc aua. Sch'ei mondi zacu dapli aua, sche mondi quei material ora sils praus nua ch'igl ual ei buc teis avunda. Ei sappi denton era esser ch'ei staupa zanua igl ual ed il prighel da sbuaus s'augmenta.

*Uauls:* Ord miez dils vischins vegn remarcau che la via denter Plaun Asch - Resgia Veglia hagi pitiu ils transports da lenna ch'ei vegni fatgs cun la lenna derscha igl univern vargau.

Andiast, ils 23 d'october 2009

Il president:

Igl actuar:

Sievi Sgier

Giovanni Damiano